

Jumpa pukak bersama ikan yang telah mati

Kegiatan tangkap ikan kelah secara haram di Tasik Kenyir terbongkar

Oleh NORHASPIDA YATIM

HULU TERENGGANU

Kegiatan penangkapan ikan kelah secara haram oleh sekumpulan lelaki di Tasik Kenyir di sini akhirnya terbongkar susulan penemuan dua rawan pukak dan sebuah bot yang ditinggalkan untuk digunakan menangkap ikan.

Menurut jurucakap Koperasi Eko Pelancongan Tasik Puah, Hulu Terengganu, kegiatan itu dikesan sejak 27 Disember lalu berdasarkan aduan daripada orang awam.

"Kumpulan kami membuat rondaan pada 28 Disember lalu malangnya kumpulan lelaki berkenaan berjaya melarikan diri bersama hasil tangkapan.

"Operasi mengesan lokasi yang menjadi sasaran pencerobahan diteruskan semalam (4 Disember) melibatkan beberapa kawasan seperti Spill Weir, Sungai Pelagong, Sungai Terengganu Mati, Sungai Sireh dan Sungai Limbang.

"Hasil pencarian oleh 19 anggota termasuk Jabatan Perhutanan Negeri membawa kepada penemuan dua rawan pukak yang dipasang di Tasik Puah bersama ikan yang telah mati akibat terperangkap pada alatan itu.

"Selain itu, kita juga mene-



Pukak yang ditahan bersama ikan yang telah mati ditemui dalam rondaan yang dijalankan semalam di Tasik Puah, Hulu Terengganu.

mukan sebuah bot yang disorok pada sebatang pokok di Sungai Pelangong sekali gus menguatkan lagi dakwaan wujudnya aktiviti penangkapan ikan kelah secara haram di kawasan itu," katanya ketika dihubungi *Sinar Harian* semalam.

Beliau berkata, timbul persoalan bagaimana kumpulan terbabit boleh melepasi kawasan larangan itu sedangkan permit diperlukan untuk memasuki kawasan tersebut.

"Kita curiga bagaimana kumpulan itu boleh menceroboh kawasan larangan ini memandangkan sekarang musim spesies ikan kelah sedang bertelur dan membiak.

"Kawasan ini ditutup kepada kunjungan ramai bagi membolehkan spesies itu membiak dan melalui proses matang bermula Disember lalu hingga hujung

Februari depan," katanya.

Mengulas lanjut katanya, tular di media sosial video sekumpulan lelaki bersama ikan kelah yang ditangkap di dalam guni termasuk yang tersangkut pada pukak.

Katanya, video itu dimuat naik seorang individu di laman sosial pada Disember lalu.

"Video itu menguatkan lagi dakwaan terdapat kumpulan yang menceroboh kawasan ini untuk menangkap ikan kelah," katanya.

Beliau berkata, pihaknya telah membuat laporan di Jabatan Perhutanan Negeri dan Jabatan Perikanan Terengganu pada 2 Januari lalu berhubung kegiatan mencurigakan itu.

"Kita harap kegiatan seumpama itu dapat dihentikan. Lebih-lebih lagi ketika ini sedang berlaku musim pembiakan ikan kelah di Tasik Kenyir," katanya.